

COMUN

No duc dacordo su la revijion dei tarens ocupej da piste da schi

El consiadou de mendrànza Claudio Sorarù a damané speigazion sui scioldi da le zentraline



Discuscion nte consei de comun su la domànda de riduzion de le superfisc de le piste da schi prejentada da Funivie Arabba.

La proposta de riduzion dei tarens dourei da le piste da schi damanada da Funivie – Arabba e decorèsta fora ntel ultimo consei de comun, no l'ava vedù dacordo duta la magiorànza. La sozieté l'ava mané ite al Comun en studio con cherte e mape, ulache la desmostra che, da le ultime mesurazion fate con nuos strumenc tecnologizi, la superfisc de taren del bon dourada e ocupada per piste e lifc l'é mendra de chèla che l'é stada accertada fin adés. Nte la discuscion envalgugn consiadous i a damané de cotánt de sarà de consequenza i scioldi n manco che tirará ite el Comun dal canone de fit dei tarens.

A la domànda a responù el vize capocomun Francesco Martini (el Capocomun l'ava mossù jì fora dal self comun per interes personai) che l'ava spieghe che chëst comportarà n'entrada de zirca 30 mile euro en manco. Perplessité i é stade trate fora en particular dai consiadous de magiorànza Massimo Pallua e Leo Crepez, che l'ava osservé che el studio l'ava mossù ester fat da nen tecnico independent e no da un de la sozieté e che nte le cherte mancia na mapa ulache ven sourapiade le superfisc »vegle« a chèle nuove. Per chëst i doi consiadous i s'ava astignù auna a la mendrànza.

Opojizion critica su scioldi da le centraline e per la senta de la Crousc Blància

Dai banc de l'opojizion el consiadou Claudio Sorarù l'è entervegnù plù oute su desvalive cusion. El prum intervent l'è sté per damané che l'amministrazion investesse deplù scioldi per le strade da bosch che nta Fodom i é en gran pert desfate. Toni plù dur l'ava douré enveze per damané speigazion su doi delibere de la jonta destinade a compré la senta de la Crousc Blància. »Per la medema motivazion l'è doi zifre con ben 70 mile euro de diferenza – l'ava toné Sorarù. »Ulà ele le cherte che giustifichèa chisc scioldi?« El Capocomun l'ava responù che nte una de le doi l'ava pervedù scioldi ence per autri progec. El consiadou de mendrànza l'ava pò damané al Capocomun se i paroni de le zentrali i paia encora al Comun i canoni damané come compensazion ambiental. El prum zitadin l'ava spieghe che el Tribunal Aut de le Ieghe l'ava declaré illegitimi chi canoni e che spò adés el contribut al Comun el ven calcolé en baje a na pert fiscia liada al fit dei tarens e una liada a la produzion. Per feni Sorarù l'ava damané ci che vignarà fat de la strada che porta a la nuova zentral sul Ru d'Andrac. »No duc n't Andrac i la vòl e cuscita coche l'é la no sierfa degugn – l'ava dit. Encora Grones a speighe che i tecnizi i é ntel laour de fé de le valutazion ma che la vignarà comedada nte toc plù èrc. LS

ATUALITÉ

Gran festa per i 40 agn de Radio Più

L'emitenta agordina, con a cé suo diretor e anima Mirko Mezzacasa, nte agn l'é diventada pont de riferiment e la ousc de informazion »via etere« no demè per la valada ma ence per duta la provinzia de Belun. Trope le scomenciadive per la festa



L'è diretor Mirko Mezzacasa l'ava taia la tourta per i 40 agn de Radio Più.

L'èva el 25 de jujn del 1983 cànche nte na ciana de la vegla cesa de comun a Taibon scomenciàva a jì fora nte l'aria le prume trasmiscion de Radio Più. Ntel Agordin no l'èva la pruma radio. Davánt chelche ann l'èva nasciuda »Radio Alleghe« che l'ava bu delongo en gran suzèss ma che per deplù rejon no l'èva durada trop. La scomenciadiva la ruáva ence ntel Agordin davò che per duc i agn setánta le cuscita clamade »radio libere« i ava raprejenté na vera rivoluzion culturala. Nte chi agn »l'aria« l'èva libera e valgugn s'ava pensé de la emplenì con frequenze de trasmiscion radio e nte puoch temp fossa nasciù mile e mile radio e televizion n duta Italia. Na difujion che a la fin l'èva diventada salvaria, tant che su la fin dei agn '70, vigniva fat na lege per regolamenté el setor. »Per chi che, come el sotscrit, l'èva e l'è en amánt de la radio, la poscibilité de mète su na radio locala, al servisc de la jent l'èva diventada empruma na bela idea e tost davò na scometuda – conta el diretor e anima storica de Radio Più Mirko Mezzacasa. »Nte la conca agordina – el disc encora – degugn ava vaghé tant e chèsta l'è stada delongo nosta ambizion: creé en mezo de informazion a l servisc de la comunité. Na scometuda no saurida da vadagné, ma che on tout su con pascion. A ie creie l'è sté diesc fondadous: Sereno Ben, Paolo Buttolo, Agostino Cadorin, Dino Colarin, Renzo Gavaz, Alessandro Savio, Gianna Schena, Danilo Sibillon »Moncio« e Pierina Bellai. Onve ciapé albiher nte tre ciane del vegle comun de Taibon. L'èva da mète su i ripetidous, fè i prums programs, ijolé le ciane. Nte chi meisc no se ciapàva plù cartons dei vuof: i onve dourei duc nos. E po' l'èva da ciapé en inom. Dute le radio n chi agn le se deva l inom del pais da ulache le trasmetàva. Cuaji en vincol spazial. Cuscita l'è sauté fora l inom Radio Più. E de chëst son tres stei orgoglious. La pruma frequenza, chèla storia, 97,800 Mhz. El 25 de jujn, da le 13:41, Danilo Soppelsa, davò i saluc de rit el prejentàva Radio Più ai radioscoutadous con chelche ciántia a meza ite. L'èva ju dut polito – ricorda encora Mirko. Na mucia i prums colaboradous che con pascion ava scomencé i prums programs. E pò sonve mi, che eve na gran pascion e na gran ciao. Eve da fé la naia. Sonse rué en Ègort e cuscita fajève cesa, cajerma radio. Cànche l'assa feni la najia, la radio fossa diventada suo laour. Fossa diventada »Radio Più de Mirko Mezzacasa«. La radio

l'assa scomencé con sue trasmiscion da vignidi, ence se – coche recorda Mirko i »vejins de cesa« ntel zenter de Taibon i ne cialàva mel e co al scusa che disturbónve, i voléva ne fé saré. Forsci i pensàva che volónse mète su chi sa ci strument de propaganda politica. Cuscita no n'èva e no n'è me sté nte noste entenzion, sedenò onse saré da nen toch. El 10 de jujn del 1985 i studi i se tramuda in Vicolo della Madonna, tres a Taibon. Vigniva metù su nuove antene fin a arjonje ence la pert plù auta del Agordin. Chelche ann davò la se tramuda in Via Paris Bordone, da ulache la trasmèt encora encoui. Un dei prums programs plù aprijei, encora encoui, la ressegna dei giornai da le 8 dadomán, tres co la ousc de Mirko Mezzacasa. »Ma la radio l'ava tres bu plù sort de trasmiscion. On cialé de calé la programazion sui debujens e su le esperienze del teritorio, de no jì davò ale mode ma a chèl che el teritorio deva. L'è ite dedut: l hockey, l balon, la mujica, i notiziars, la viabilité. On na frequenza ntra Belun e Ègort pe garanti informazion su la viabilité e co l'è problema la jent che scouta la se multiplicheia. Radio Più la dedica ence lerch a la cultura ladina. A la metà dei agn novánta l'èva pié via en program ogni setemana de rassegn stampa de la Usc di Ladins. Da n per de agn nca la radio la ospiteia programs come l Alamanch Ladin e autri metùs a jì en colaborazion col Istitut Cultural Ladin Cesa de Jan. E pò l'ativité la s'ava tramudé ence sui social. »Si – sul canal Telegram ruon a arjonje 4 mile persone, autre 50 mile su facebook. Sul scito on na media de 10 – 15 mile azésc al di e 25 mile plate che ven visualizade. Numer chersciù ntel temp. LS

La festa

Per i 40 agn Mirko e suo staff i a pensé a na grana festa con trope scomenciadive. Una de chëste na mostra de vegle radio: zirca 150 toc. Aparac che va dai agn 20 del '900 ennavánt, trope de proprieté de Mirko, gran apascioné che l'ava ciapade scincade o nte marce de robe vegle e de autri colezionis. »Da puoch el conta, da la Svizzera m'è rué na Radio Alfiere dei agn '60. Sabada per dutoldi la radio l'è stada en diretta co le telefonade dei radioscoutadous che clamàva su per fé i auguri e conté chelche suo ricordo lié a la radio. Doménia sèra la grana festa e la cèna coi colaboradous, i clienc storizi e i amici a La Fabbrica Pedavena a le Campe en Ègort. LS

SANITÉ

L'ospedel de Ègort entitolé a Papa Luciani

L'assessor a la sanité del Veneto Lanzarin l'ava descovèst de emozion e recugniscènza per Papa Giovanni Paolo I, che trop l'ava dé fora n pruma persona nte i ospedei per porté confort a le jent che steva mel

Festa grana sabada 23 de jujn al ospedel de Ègort per la zerimonia de entitolazion a Papa Giovanni Paolo I, Papa Luciani. La decijion de dediché la struttura sanitar de la valada del Agordin al »Papa del sorio« nasciù proprio chilò, a Canal de Ègort, l'èva stada tutta su dal governor del Veneto Luca Zaia su domànda de l'Union Montana Agordina e del Comun de Ègort. Delongo davò la sua beatificazion, che l'è stada davánt gnánca en ann, ai 4 de setembre del 2022, l'è scomencé l iter per la sua entitolazion. »La giornada de encoui l'ava segné en moment fora dal sciolito, vivèst con grana emozion, comozion e con recugniscènza per en Papa, en gran om, na persona umola e forte ntel medemo temp, prejent de continuo, con deplù enciarie, nte i ospedei per sté dinongia e porté confort a chi che steva mel. N Papa che a dé trop a le comunité belunej, al Veneto e al rest del mondo che continua al recordé con afèt« l'è sté el comént del assessor regional a la sanité Manuela Lanzarin co l'è sté descui la tabela de intitolazion a Papa Luciani a l'entrada del ospedel de Ègort. Na targa realizada con en sass de Castellavazzo, che simbolegeia da ulache ven el Beat, la caparbieté e souradut l'Humilitas, dit ciernù fora da Albino Luciani co l'è sté nominé Papa e carateristiga che a segné, con gran forza, sua azion



Le autorità davánt a la tabela de entitolazion del ospedel de Ègort a Papa Luciani. foto dal grup fb Ulss 1 Dolomiti

pastorala. A la zerimonia a tout pert duta la comunité, con duc i sèdesc capocomuns de la valada e le associazion de volontariat de le ambulánze. Prejenc ence el comisar de l'Ulss Dolomiti Giuseppe Dal Ben, l'Èvesco Renato Marangoni, l'Prescident de la Provinzia Roberto Padrin e la fameia de Albino Luciani. »N ospedel – a dot encora l assessor – l'è atenzioné a 360 gradi da la Region del Veneto che l'ava a cuor i problemi de la mont, con sue sone plù descomede e difizili da podei prò. No l'è en cajo, defati, che proprio da puoch la Region l'ava metù a jì en secondo elicotero per

la stagion da d'isté. Descore de n'atenzion mascima per la sanité de chëst teritorio, che va dal pont de veduda struttural, tecnologich e profesional. L'è pont de Prum Aiut, che l'ava en nuof primar da envalgugn setemane, l'ava arjont el traviert de la fin dei laour: l'ativazion de la nuova sòna ambulatoriala, la ristrutturazion co al nuova shock room, la ciana gesci e la realizazion de la ciana ciada. En impegn emportánt – a saré via la Lanzarin – per en servisc fundamental come che l'è chèl de le urgenze e emergenze, che a comporté en investiment de 3 milioni de euro.